

# Powšitkowne WOZJEWJENJA

njedźelu, 18. decembra 2016

## **Přiležnosć k swjatej spowědži w Róžeńce**

**póndźelu, 19. decembra** farar G. Warnar, farar M. Anders,  
17.00 – 18.00 hodź. farar M. Nawka, farar J. Magiera  
**wutoru, 20. decembra** farar M. Anders, farar M. Nawka,  
18.30 – 19.30 hodź. farar D. Dzikiewicz, farar St. Börner

Wšitcy, kotřiž chcedža wutoru sakrament wujednanja přijec, njech prošu wobkedźbujaja, zo je we 18 hodź. w cyrkwi Boža mša.

## **Beneficny koncert za projekt w Africe**

Adwentny hudźbny nyšpor budže njedźelu, 18. decembra, w 14 hodź. w Chróśćicach. Jón wuhotuja spěwny kwartet a młodži hudźbnicy Chróśćanskeje wosady. Zběrka při durjach budže za zakładnu šulu franciskankow w Malawiju, kotruž su paduši spočatk oktobra nadpadnyli a wurubili. Serbowka Christina Pólkec, kotraž je hižo w léće 2012 w Malawiju přebywała, poda so bórže zaso do Afriki a chce pjenjezy tam wosobinsce přepodać. Wšitcy su wutrobnje do Chróśćic přeprošeni.

## **Adwentny koncert SLA**

Pod titulom „Patoržicy blisko“ přeprošuje Serbski ludowy ansambl (SLA) tutu njedźelu, 18. decembra, w 16 hodź. na adwentny koncert. Na žurli SLA w Budyšinje zaklinča nimo mjezynarodnych a němskich titulow serbske twórby kaž „Pastyrjo, słyšće“, „Přadla je Marja“ abo delnjoserbski spěw „Před gwězdku“ z pjera Detlefa Kobjele. Moderaciju programa změje Kristina Nerádova, kotraž změje tohorunja tu abo tamnu hodownu stawizničku spřihotowanu.

## **Koparski turněr wo pokal TCM**

Towarstwo Cyrila a Metoda z.t. (TCM) zarjaduje sobotu, 7. januara, w 14.00 hodź. w Chróśćanskej „Jednoće“ halowy koparski turněr wo pokal TCM. Přeprošene su wosadne a wjesne mustwa młodžiny kaž tež mustwa sportowych jednotkow. Kóžde mustwo měło z wosom hrajerjemi nastupić. Hrać budže so z třomi koparjemi a wrotarjom. Přizjewić měli so mustwa hač do pjatka, 30. decembra, pola Guida Zahrodnika, telefonowe čisło (01 51) 52 22 17 59.

## **Mandźelske seminary 2017**

Termíny mandźelskich seminarow za přichodne lěto su 3./4. februara w Kulowje, 10./11. měrca w Pančicach-Kukowje kaž tež 31. měrca / 1. apryla a 1./2. decembra w Domje biskopa Bena w Smochćicach. Přizjewić měli so zajimcy pisomnje pola Dekanatneho dušepastyrstwa, Młynski puć 4, we 01920 Worklecach abo pod e-mailowej adresu [don.boskowy-dom@t-online.de](mailto:don.boskowy-dom@t-online.de). Formulary k tomu móža sej w cyrkwjach sobu wzać.

## **Hodowny nyšpor w Róžeńće**

Chór Lipa wuhotuje pjatk, 30. hodownika, we 18 hodź. w Róžeńčanskej cyrkwi swój tradicionelny beneficny nyšpor. Na nim zaklinča hodowne spěwy serbskich, českich a druhich komponistow. Zběrka při durjach budže lětsa za cistercienski klóšter w českim Oseku. Wšitcy lubowarjo hodownych zynkow su lubje witani.

## **Hodowny koncert w Radworju**

Swój lětuši hodowny koncert wuhotuje chór Meja pjatk, 30. decembra, w 19 hodź. w Radworskim hosćencu „Meja“. Jako hosći su sej Mejenjo dźiwadźelnika Měrka Brankačka a „Jolka“-džěci z Nuknicy přeprošyli. Lětuši program je nimale ryzy hodowny. Zdobom chcedža Mejenjo w nim tež na swojeho dołholětneho dirigenta Achima Brankačka spominać, kotryž by lětsa swoje 90. narodniny swjećił. Koncertej přizamknu so reje z kapału Con-takt. Wšitcy su wutrobnje do Radworja přeprošeni.

## **Silwester hudźbny nyšpor w Baćonju**

W radosći Božej damy lětu 2016 wuklinčec z hudźbnym nyšporom sobotu, 31. hodownika, w 19 hodź. w našej cyrkwi Jězusoweje wutroby. Wo muzikaliske wuhotowanje postara so swójba Klemensa Čórliha z Kulowa pod nawodom syna Lukasa. Wutrobnje přeprošuje Baćońska wosadna rada.

## **TCM – „Łužica pomha“ prosy wo dary za džěacy hospicny wotrjad**

Towarstwo Cyrila a Metoda z.t. (TCM) chce ze swojej lětušej pomocnej akciju „Łužica pomha“ hospicny dom we Vilnjusu w Litawskej podpěrać, w kotrymž ma so wotrjad za na smjerc chore džěci zarjadować. Dom bu před lětami z klóšterskeje ruiny natwarjeny. W Serbach derje znaty farar Hans-Friedrich Fischer, kotryž wosebje w lětnich mėsacach w serbskich wosadach měšnikow zastupuje, so sobu wo financowanje hospicneho twara stara.

Džensa džěla w tutej hladarni 29 přistajenych (lěkarjo, hladarjo, domowy personal a zarjadnistwo), kotrychž wjace hač 30 ludźi čestnohamtsce podpěra. W tutym hospicu – jeničkim po cyłej Litawskej – je tuchwilu 14 małych bydlenčkow za ludźi, kotřiž su na raka schorjeli, a jich přiwuznych zarjadowanych. Před něšto mėsacami stej uniwersitna chorownja we Vilnjusu a Zwjazk katolskich žonow nawodnistwo hospica prosyłoj, zo by dom wo wotrjad za džesać na smjerc chorych džěci rozšěriło. Twarske kóšty za to wučinjeja něhdže milion eurow. Tuž prosy TCM wěriwych wo šćedriwe dary na konto Cyrill-Methodius-Verein e.V. IBAN DE 65 750 90 300 000 828 23 66, pod hesłom „Hospicny dom“. Štóž přeje sej darowansku kwitowanku, njech poda na přepokazance swoju dospołnu adresu.

*J. Špitank, předsyda TCM*

## **Pytaja hojenskeju hladarjow a kubłarjow**

Marije Marćiny dom w Pančicach-Kukowje pyta wot hnydom dweju sobudžělaćerjow z kwalifikaciju hojenskeho hladarja a kubłarja (Heilerziehungspfleger). Jedne městno je wobmjezowane na 30 hodźin wob tydžeń, druhe na 20 hodźin. Džělowy čas je w dwěmaj změnomaj. Wobě džělowej městnje matej so jako zastupowanje w samodruhosći / maćerskim dowolu wobsadzić z opciju na krute přistajenje. Nadrobniše informacije dóstanu zajimcy pola nawodnicy domu Andreje Fiedler, telefonowe čisło (03 57 96) 9 94 91 abo 9 94 92. Swoje pisomne požadanje pak njech pósćelu na adresu Klóšter Marijina hwězda, Marije Marćiny dom, Čišinskeho 35 e, 01920 Pančicy-Kukow abo z mailku na mmh@st-marienstern.de.